



الحمد لله وأشهد أن لا اله إلا الله وحده لا  
شريك له وأشهد أن محمدا عبده ورسوله  
صلى الله عليه وسلم أما بعد..  
أهلا ومرحبا بكم في لايف جديد منورين  
والنهادة الحقيقة كنت بفكر إيه الموضوع  
اللي أحنا ممكن نتناوله؟

أنا كان في موضوع من زمان خالص تاعبني  
جدا وهو إنني أرى للأسف جيل كامل من  
الشباب والبنات خلاف كل الشباب والبنات  
لكن للأسف اللي أنا هقوله دا موجود جوة جيل  
من شباب وبنات ملتزمين المفترض إن هم

ناس ماشيين في طريق ربنا سبحانه وتعالى  
نفسهم يكونوا طلبة علم دعاء أتقياء يكونوا  
قريبين من ربنا.

ايه هو اللي انا هتكلم فيه؟ هتكلم إن أنا شايف  
جيل كامل بيعمل حاجات مكناش نتخيل في  
يوم من الأيام أن هحصل تساهل فيها للدرجة  
دي. جيل كامل عنده مناطق كاملة من التقوى  
مش موجودة أصلا جيل كامل عنده كبائر  
بيعملها كل يوم، عشرات المرات على الأقل  
ويمكن هو مبيأخدش باله أصلا أن هو بيعمل  
حاجة زي كده وساعد على كده الانتشار  
الكبير جدا للكبائر دي في المجتمع، تساعد  
على كده الميديا، وساعد على كده سهولة  
الوقوع في الكبائر دي.

خلينا النهاردة نتكلم في القصة دي أن  
الموضوع ده رهيب جدا يا جماعة. أنا أحياناً  
بنقعد ندرش في مواضيع وبنتكلم في حاجات  
دقيقة في الإلتزام، قيام بقى خشوع، التدبر،  
والقرآن، وفي الآخر ممكن نقع في طوام  
كبرى، هو إيه اللي حصل في حادث  
الاسماعيلية يا جماعة عشان أنا مش متابع؟ أنا  
كنت بحضر اللايف لو حد بسرعة يكتب لي  
بسرعة إيه اللي حصل ربنا يبارك فيكم يارب.

طيب اللي أنا عايز أقوله إن إحنا عندنا دلوقتي  
مشكلة، \_ الله المستعان نسأل الله السلامة  
والعافية \_ للأسف خلاص وإحنا بنتكلم دلوقتي  
في مآسي بقينا سبحان الله يعني أنا لسه هتكلم  
في نفس القصص دي إن إحنا بنشوف دلوقتي  
بقولك وصلنا لمرحلة إن بقت أكبر الكبائر

سهلة علينا أنا لسه كنت هفتح بس في الموضوع ده لسه هفتح في الموضوع دا وأنتم بتتكلّموا دلوقتي في حادث الإسماعيلية اللي حصل وأنا بتكلم واحد ذبح واحد وقطع رأسه في نصف الطريق ومن شوية كان في فيديو لبنات بنت في مدرسة تفتح مطوة ومسجلاها فيديو. وبتهدد صاحببتها إن هي مستنياها في بورفؤاد في بورسعيد علشان تديها بالمطواة بنت بنت فتحت مطوة على زميلاتها ومسجلة ده لايف عادي إحنا خلاص بقينا بنشوف كوارث عادي كل الكبائر **سميت الفيديو** **ده كبائر منسية ليه؟** إحنا بنشوف دلوقتي كل أنواع الكبائر اللي واحدة منها ممكن تهلك أمة وعادي. وبقي الموضوع سهل إن إحنا نستقبله إن إحنا نسمعه إن إحنا نتجاوزه إن إحنا نفسنا

نقع فيه كل الكبائر النبي عليه الصلاة والسلام  
قال عليها بنقع فيها صباح مساء. النبي عليه  
الصلاة والسلام طبعاً قال على كبائر كثير.  
وخص منها سبعة. يعني هل الكبائر سبعة  
بس؟ ولا أكثر من سبعة؟؟

لأ الكبائر قطعاً أكثر من سبعة بكثير. هو  
الكبيرة بتتعرف منين اصلاً؟ بتتعرف إن دايم  
بيجي في الشرع خطاب خاص بها. يعني  
تكون الكبيرة دي لها حد معين. إن ربنا بين إن  
لها عقوبة معينة زائدة عن العقوبة العادية في  
النار. إن النبي عليه الصلاة والسلام يتكلم إن  
ربنا لعن اللي يعمل كده. أو ليس منا من فعل  
كذا. الكبائر لها كده صيغ معينة. بيتعرف منها  
إن دي كبيرة. فلو تتبعنا نصوص الشرع في  
الحاجات اللي فيها حدود. زائد اللي فيها

عقوبات خاصة يوم القيامة غير النار عموماً  
، لا عقوبات خاصة زائدة عن النار. زائد كل  
الأحاديث التي النبي عليه الصلاة والسلام قال  
فيها ليس منا من فعل كذا. لعن الله من فعل  
كذا. قاتل الله من فعل كذا. كل الحاجات دي  
دي الكبائر. يعني دي بعض العلامات التي  
بقول لكم عليها. عشان كده الحديث التي هقوله  
لكم الوقت ده هو قال أكبر سبعة منهم مقلهمش  
كلهم. وإلا فالكبائر أكثر من سبعة..

بل بعض العلماء عد الكبائر فوصلهم لسبعين  
كبيرة النبي عليه الصلاة والسلام (قال اجتنبوا  
السبع الموبقات) وليس معنى ذلك إن الكبائر  
سبعة لا بل هم إلى السبعين أقرب ولكن دول  
أكبر سبعة فيهم (قال اجتنبوا السبع الموبقات)  
ثم قال (أولا الإشراك بالله اثنين السحر ثلاثة

قتل النفس بغير حق أربعة أكل الربا خمسة.  
أكل مال اليتيم. ثم ذكر قذف المحصنات  
الغافلات المؤمنات ثم ذكر بعدها التولي يوم  
الزحف يعني شوفوا حتى السبع دول مذكرش  
فيهم الزنا نفسه، نوع من الزنا قطعاً من  
الكبائر. لكن دول أكبر من كل الكبائر. إحنا لو  
مسكنا بس السبعة دول بس سنكتشف ان إحنا  
بنعمل الموضوع ده عادي، الإشراك بالله عم  
وطم بل صار الآن له من يدافع عنه الآن نحن  
نعانى من فتاوى ضالّة تسهل ع المسلمين  
الإشراك بالله فتأتى فتوى من دار الافتاء  
المصرية، تقول إن كلمة مدد يا حسين مفهّاش  
حاجة. يبقى إحنا كل اللي بنعلمه للناس إتهّد  
وكل اللي بندعوه للناس راح. لما انت تقول لي  
مدد مفهّاش حاجة. يا حسين صريحة جداً في

طلب العون وطلب النفع من غير الله سبحانه  
وتعالى. والدعاء لغير الله سبحانه وتعالى. أنت  
تسهل على الناس الشرك وتبرره وتدافع عنه.  
وتفتي بحله. في كم واحد سيقع في هذا  
الضلال المبين بسبب فتوى مثل هذه الفتوى.  
أنا أقول دائما لمن يجادل في قضية بناء  
المساجد على القبور. أو حرمة دفن الأولياء  
في المساجد. نقوله هل ذهبت يوما إلى مسجد  
من هذه المساجد ورأيت الشرك الذي يحصل  
فيه أنا أقول دائما لو إن الله سبحانه وتعالى  
حتى لم يحرم هذا فرضا يعني لكان على  
العاقل أن يمنعه لما يرى الإنسان من العواقب  
الوخيمة لوجود قبور الصالحين فرضا إنهم  
صالحين في المساجد حد فيكم دخل مسجد  
البدوي؟

حد فيكم دخل مسجد البدوي، حد فيكم دخل  
مسجد أبو العباس؟ حد فيكم دخل مسجد سيدي  
كذا؟ هل رأيت النساء ماذا يفعلون هناك؟ هل  
رأيت الرجال وهم يتقربون بالسجود لهذه  
القبور، والنذر ويضعون الأموال نذرًا لصاحب  
القبر ويذبحون لصاحب القبر..

اللي بيتكلم دا حضرت مولد من هذه الموالد  
قبل ذلك؟ هل رأيت كم الشرك بالله الذي  
يحصل في هذه الموالد؟ ذبح لغير الله، نذر  
لغير الله، دعاء وطلب من غير الله (سبحانه  
وتعالى)، فضلاً عن الكوارث التي تحصل في  
الموالد من شرب الخمر وشرب الحشيش  
والزنا واللواط وكل ما تتخيله من الفواحش  
يحصل في هذه الموالد.

ولو كانت قربة لله والله ما رأينا ذلك أبدًا ولكن  
هذا يرضي الشيطان وكان مدخل لكل الأمور  
الموبقة بعد ذلك فكيف بعد ذلك يأتي من  
يسهل على الناس كمان هذا الفعل ويفتي لهم  
أن قول مدد يا حسنين لا إشكال فيه ولا  
حرج؟! والنبى (عليه الصلاة والسلام) أول ما  
علم ابن عباس قال (يا غلام إذا سألت فاسأل  
الله وإذا استعنت فاستعن بالله) والله سبحانه  
وتعالى يقول عن هؤلاء (إن تدعوهم لا يسمعوا  
دعاءكم ولو سمعوا ما استجابوا لكم ويوم  
القيامة يكفرون بشرككم ولا ينبئك مثل خبير).  
والله تعالى يقول (ومن أضل ممن يدعو من  
دون الله من لا يستجيب له إلى يوم القيامة توهم  
عن دعائهم غافلون وإذا حشر الناس كانوا لهم  
أعداء وكانوا بعبادتهم كافرين) دا أول حاجه

بس، أنا مجرد بقولك الإشراف بالله اللي إحنا  
مثلاً متخيلين لأ إحنا مسلمين ياعم الشيخ الحمد  
لله دي مش عندنا لا ده عندنا وعندنا منها كثير  
صور الشرك الآن وسط المسلمين كثرت جداً  
ولا حول ولا قوة إلا بالله، الإشراف بالله.

ثم قال النبي (عليه الصلاة والسلام) السحر  
الآن السحر حِدَّتْ ولا حرج، ملأ الأخضر  
واليابس، السحر في الصعيد موجود، في  
الأرياف موجود، في المدن يعني أقل شوية  
لكنه صار الآن موجود السحر الذي هو  
السحر الكفر الذي فيه استعانة بالجن الآن  
هوس البحث عن الآثار، هوس معرفة بعض  
الغيبات دفع الناس إلى إما ممارسة السحر أو  
الاستعانة بالسحرة الذين يتقربون إلى الجن  
تقرباً صريحاً واضحاً. يقدمون لهم القربات،

يقدّمون لهم القرابين لكي يفعلوا ما يطلبونه منهم. سمعنا آخر قصة إن واحد الجن طلب منه علشان يطلعوله الآثار المدفونة إن هو يقتل ابن عمه ووصفه له بالوصف، وفعلاً قتل ابن عمه وفعلاً طلعوا له الآثار بعديها. وأدي القتل لأن السحر سيؤدي إلى القتل، والسحر على أنواع. في السحر اللي بيستعان فيه بالجن. ده لا شك أنه كفر بالله تعالى. ( يعلمون الناس السحر وما أنزل على الملكين ببابل هاروت وماروت وما يعلمان من أحد حتى يقولوا إنما نحن فتنة فلا تكفر فيتعلمون منهما ما يفرقون به بين المرء وزوجه) هذه من أكبر الموبقات التي ألفها الناس، بقى خلاص عادي بنسمع عن واحد استعان بساحر، استعان بعراف دجال، علشان

يعرف له مشكلة علشان، يطلع له آثار، هناك نوع ثالث من السحر اللي هو بنسميه خفة اليد، أو السحر القائم على الخدع السريعة ممكن غير معتمد على الجن، ولكنه معتمد على السرعة وخفة اليد.

هل جائز لعدم وجود الاستعانة بالجن؟! نقول: لا طبعًا، بل هو حرام، من العلماء من ضمه إلى نوع السحر الأول وعده كفر.

ومن العلماء من لم يضمه للأول وعده فقط من الكبائر.

تعالى دلوقتي هاتلي واحد زي كريس المصري، ساحر مشهور، غير مسلم لكن انظر إلى انبهار الناس به، وكم المشاهدات التي تحققها فيديوهاتة!! وانظر إلى كم الشرير

من مسلمين قبل غير المسلمين لفيدوهات  
السحر.

ستقول لي هذا خفة يد، لو افترضنا جدلاً أنه لا  
يستعين بالجن هو فقط يشتغل بخفة يد، هذا لا  
يعني أن ما يفعله حلال بل هو أيضاً حرام؛ لأن  
السحر كله حرام، لكن فيه ما هو كفر أكفر  
الذي يوجد به استعانة بالجن، ومنه ما هو من  
الكبائر المعتمد على خفة اليد؛ لأن السحر حتى  
وإن كان نوع من الخداع وخفة اليد فهو تشبه  
بالسحر وإدعاء أمور ليست إلا لله، كأن يوجد  
شئ من العدم أو يدعي أنه أحياء أو أموات حتى  
لو على سبيل الخدعة، فهذا محرم بلا  
شك. تمام؟ فضلاً وإن كنت أشك أن كريس  
المصري يقتصر على خفة اليد فقط حتى وإن  
زعم هو ذلك، فهناك أمور لا يمكن أن تحصل

الإبالجن، فحسن الظن به أنه لا يستعين بالجن لكن يغلب على ظني أنه يستعين بالجن في بعض الأمور، وعلى ذلك فممارسته نفسها بها أنواع من الكفر، ولكن للأسف المشاهد العادي لن يميز ما كان بخفة يد وما كان بالجن. لكن عمومًا مشاهدة ونشر هذه الفيديوهات أقل درجاته أنه محرم، وإعانة على المحرم، وتمجيد لشيء محرم، ونشر لشيء محرم، ومساعدة لنشر الكبائر.

السحر المعتمد على خفة اليد ومعتمد على الأضواء والدخان، هو حرام بإتفاق العلماء.

لهذا سميت هذا الفيديو كبائر منسية لأنني أعلم بأن هناك شخص سيسألني هو مدد مالها؟! لهذا سميته كبائر منسية، من كثر ما مر علينا

هذه المواضيع أصبحت منسية، لا أحد يتحدث فيها ولا أحد يدافع عنها، في جيل نساها أصلاً!

طبعاً قول مدد غير جائز، وهو دعاء لغير الله (سبحانه وتعالى) لأن مدد تعني طلب العون.

**وفي واحد يسأل: هو سحر خفة اليد حرام؟!**

أيوة حرام، باتفاق العلماء لأنه تشبه بالسحر ولأنه فيه إدعاء لأشياء هي من خصائص الله (سبحانه وتعالى) مثل الإيجاد من العدم (أي الخلق) ومثل الإحياء والإماتة، حتى لو على سبيل الخداع فلا يجوز لإنسان أن يدعي شئ هو لله (سبحانه وتعالى) حتى وإن قال أنه سيمزح أو بخدع أو بفعل ذلك غير حقيقي!!

لايجوز ذلك لأن هذه من خصائص الربوبية ولا يحل لأحد وإن كان مازحاً أن يدعي شئ من ذلك. تمام؟

فباتفاق العلماء أن السحر حرام، فإن كان فيه  
أيضًا استعانة بالجن صار هذا السحر كفر  
بالله (سبحانه وتعالى).

فلا يحل لي أن أسأهم في نشره، أو أشجع  
عليه، أو أجيب أولادي يشاهدوه، ويفرحوا  
ويسقفوا.

متنساش كل ما أقول شئ افكر إن أنا مسمي  
الفيديو إيه؟ كبائر منسية تمام؟

الإشراك بالله... السحر أدى أحنا ده أحنا في  
التانية بس تمام؟

قتل النفس التي حرم الله إلا بالحق تمام؟ قتل  
النفس أدى وأنا بتكلم أهو أنتم بتقولوا لي في  
واحد دلوقتي في الإسماعيلية دبح واحد وشال  
رقبته واتمشى بها في الشارع ، ودلوقتي

بنسمع اللي قتل أمه وقتل أبوه وبنسمع على  
أهوال ما يعني والمشكلة الأخبار بقت تعدي  
عادي خلاص بقى عادي جداً إن أنت تسمع  
واحد قتل زوجته وهي قتلت زوجها، واحدة  
قتلت جوزها وولادها لسه الخبر ده حديث  
قتلت جوزها وولادها علشان عشيقها إيه ده؟  
إحنا فين؟

عدينا من القتل الله المستعان القتل ثم قال  
النبي صلاة والسلام الربا الربا وأكل مال اليتيم  
حدث ولا حرج عن الربا الربا الذي ملأ السهل  
والوادي متنساش ها كبائر منسية

فوائد البنوك ربا ، القروض من البنك ربا  
حتى وإن أحتلها دار الإفتاء أنا عايزكم عشان  
بردو ما تنسوش إن أنا سميته إيه؟ كبائر  
منسية تمام؟

عايز أي حد بيسمعني أنا مش هتكلم على  
موضوع الربا ومش هدافع كثير عشان بعض  
الناس زي ما قولتكم ليه منسية لإن من كتر  
الفتاوى الباطلة خلاص إحنا قربنا ننسى إن ده  
إيه؟ حرام خلاص بقى دلوقتي المستقر تقريباً  
عند كل الناس إن فوائد البنوك حلال يا شيخ  
الأزهر بيقول كده الدار الفتوى بتقول كده كل  
اللي في الشيوخ اللي على التلفزيون بيقولوا  
لنا كده، لدرجة إن بقى في جيل كامل دلوقتي  
ما عندوش حتى المسألة فيها خلاف حتى  
ومبقاش بيستوعب أي حد يقول له حاجة ثانية

أنا مش عايز أهري كثير في الموضوع دوت  
ولا أتكلم كثير لكن أنا عايز أوصي كل واحد  
فيكم بوصية واحدة بس وصية واحدة بس أول  
ما تقفل اللايف دوت تروح تعملها أكتب على

جوجل فتاوي كبار علماء الأزهر في ربا  
البنوك ، أكتب على جوجل يا ريت اكتبوا  
الكلمة اللي أنا بقولها دي دلوقتي فتاوى كبار  
علماء الأزهر في ربا البنوك وأكتب جنبها  
بي دي إف فتاوى كبار علماء الأزهر في ربا  
البنوك وأكتب جنبها بي دي إف هيطلعك  
كتاب كتاب ، الكتاب ده جمع فتاوى الأزهر  
من أول ما البنوك فتحت لغاية يعني شيخ  
الأزهر اللي فات الله يرحمه بقى سيد طنطاوي  
، لغاية شيخ الأزهر اللي فات جاب كل  
الفتاوى سواء الفتاوى الفردية للشيخ الأزهر  
أو فتاوى مجامع الفقه الأزهرية في ربا البنوك  
ده كتاب كامل جمع كل الفتاوى الأزهرية  
وكلها اتفقت على كلمة واحدة من يوم ما فتح  
البنوك لغاية الشيخ سيد طنطاوي ومن يوم ما

مسك الله يرحمه وكل الدنيا اتغيرت والفتوى  
اتغيرت إلى يومنا هذا علشان في ناس  
هتقولك يا شيخ أنت متشدد و أنتوا السلفيين  
كده ما هو الملحنين دول مش عايزينا نأكل  
عيش وبتاع أنا مش هتكلم كثير بس أنا بقولك  
وصية وما تنساش اسمه كبائر منسية وشوف  
هما كتبوا إيه؟ سهلة جداً كتاب صغير هتقرأه  
فتاوى كبار علماء الأزهر الشريف في ربا  
البنوك بي دي إف كتاب في كل حاجة وأنا  
مش هتكلم ومتنساش إن اسمه كبائر منسية  
أكل مال اليتيم بيحصل كثير ثم قال النبي عليه  
الصلاة والسلام قذف المحصنات الغافلات  
المؤمنات قذف المحصنات الغافلات  
المؤمنات ده كثير بقى بقى سهل جداً إن الناس  
تتعرض سواء بصراحة أو من طرف خفي

لاتهام البعض بالفواحش والزنا، حتى وإن كانت إنسانة مثلاً متبرجة أو حتى يا أخي كانت ممثلة لكن ليس معنى إن هي متبرجة أو ممثلة إن ده يبيح التعريض بيها بالزنا، احنا دلوقتي بقى عادي جداً جداً إن احنا نلاقي في الكومنتات اتهامات صريحة بالزنا وبنحو ذلك سواء بعبارات صريحة أو بعبارات غير صريحة، وناس بتضحك وكومنتات ضاحكة وإيموشنز ضحك على كومنتات فيها اتهام صريح بالزنا وكلام بقى مشابة؛ البنات دي شمال والبنات دي يمين وكلام فيه إحياءات صريحة بالطعن في أعراض بنات، الطعن في أعراض نساء، أو إن مثلاً خبر كده مثلاً الناس ما بتأخدش بالها أصل من حاجات ما هو قذف المحصنات الغافلات ده بقى سهل، أنت دلوقتي

لوجه خبر عادي دلوقتي موجود إن بيقلوا  
والله الفنان الفلاني على علاقة غير شرعية مع  
الفنانة الفلانية حلو ده خبر أنت قريرته مثلاً ده  
أنا بجيب لك حاجة اكستريم أوي الفنانين كمان  
مش هجيب لك حاجة أقل من كده أحياناً  
بيجيبوا ناس عادية وأحياناً بيتهموا شيوخ  
وعلماء هل يحل لي أنا إن أنا أصلاً أفتح بوقي  
في الموضوع ده أو اتكلم فيه؟ هل يحل لي إن  
أنا أنشره؟ أي حد تكلم في هذا الموضوع أو  
نشره فعليه حد القذف ٨٠ جلدة لأنه شرط لمن  
يقذف يتكلم في عرض رجل أو امرأة كما قال  
الله سبحانه وتعالى ان يأتي بأربعة شهداء {فَإِذْ  
لَمْ يَأْتُوا بِالشُّهَدَاءِ فَأُولَئِكَ عِنْدَ اللَّهِ هُمُ الْكَاذِبُونَ}  
[النور: ١٣] {إِنَّ الَّذِينَ يَزْمُونَ الْمُحْصَنَاتِ

الْغَافِلَاتِ الْمُؤْمِنَاتِ لُعِنُوا فِي الدُّنْيَا وَالْآخِرَةِ... ﴿النور: ٢٣﴾

وقال الله \_سبحانه وتعالى\_ {وَالَّذِينَ يَزْمُونَ  
الْمُحْصَنَاتِ ثُمَّ لَمْ يَأْتُوا بِأَرْبَعَةِ شُهَدَاءَ فَاجْلِدُوهُمْ  
ثَمَانِينَ جَلْدَةً وَلَا تَقْبَلُوا لَهُمْ شَهَادَةً أَبَدًا...}

وده اللي أحنا فعلا زي ما أخونا بيسميه حب  
الفضائح؛ الناس بتحب جدا أخبار الفضائح  
بتتفاعل معها تفاعل غير عادي وهم لا يدرون  
هو لاء المساكين إلى أي هوة يلقون أنفسهم وهم  
يتكلمون عن عرض فلان وعرض فلان  
والفنانة دي في علاقة حميمة مع دوت والفنان  
دوت أتجوز دية في السر والفنانة ديت بيقولوا  
إن هي حامل من فلان... هذا كلام رهيب! هذا  
كلام رهيب ﴿وَتَحْسَبُونَهُ هَيِّنًا وَهُوَ عِنْدَ اللَّهِ  
عَظِيمٌ﴾ صار خلاص عادي جدا جدا إن احنا

نسمع ناس عادي بتكلم عن واحد بيتكلموا في  
أعراض نساء وأعراض رجال ويقولك ما هم  
يعني هم بيقلوا هم كتبوا في الجريدة قالوا كده  
وطلع على الفيسبوك وفي واحد شير الخبر،  
هذا لا يكفي يا أحباب! هذه مصيبة يا إخوان  
إن أحد يتكلم في عرض رجل أو عرض امرأة  
وكل مستنده إلى ذلك خبر في جريدة أو عنوان  
مفبرك أو كلمة عابرة أو واحد شير بوست أو  
واحد كتب حاجة من دماغه، كل من شارك في  
هذا الكلام صدقه أو نشره أو تكلم به هو قاذف  
فعل كبيرة من الكبائر يستحق عقوبة في الدنيا  
ثمانين جلدَة وإذا لم يعاقب في الدنيا أو يتوب  
فإنه سيعاقب يوم القيامة إن شاء الله \_ سبحانه  
وتعالى \_ ، كبائر منسية بقى ده العادي بل نحن  
بنتلذذ لما بنسمع كلام زي دوت الكلام في

الأعراض والكلام في الزنا والكلام في  
الفواحش بقى ملذة المجالس نسأل الله السلامة  
والعافية، والفرار يوم الزحف؛ من كبائر التي  
صارت الآن عادية جدا جدا وهي الغيبة  
وما أدراك ما الغيبة؟ لا شك إن الغيبة من  
الكبائر قال النبي \_ عليه الصلاة والسلام\_:  
"الغيبة ذكرك أخاك بما يكره" وربنا \_ سبحانه  
وتعالى\_ خص الغيبة بوصف بشع في القرآن  
دل على أنها من الكبائر قال: " أَيْحِبُّ أَحَدُكُمْ  
أَنْ يَأْكُلَ لَحْمَ أَخِيهِ مَيْتًا فَكَرِهْتُمُوهُ وَاتَّقُوا اللَّهَ إِنَّ  
اللَّهَ تَوَّابٌ رَحِيمٌ " [الحجرات: ١٢]

**الغيبة ما أسهل الغيبة! الغيبة الآن مبقتش يا**  
**جماعة إن أنا هاجي من ورا واحد واتكلم لا لا**  
**لا... الغيبة بقت دلوقتي أسهل من كده بكتير؛**  
**الغيبة دلوقتي بقت كوميكس**

عادي جدا كوميكس عادي، في لعب كورة  
مركبين دماغه على دماغ فنان في كاشن كده  
من مسلسل ولا من فيلم وحاطين كومت لازع  
كده بيضحك وانشر يا عم يلا انشر وضحك  
الناس وخذ الترند وأسبق وانشر الكوميكس  
وألـس على لعب الكورة بعد الماتش كده وحط  
صورة حارس المرمى مكان محمد سعد  
وحطلي صورة فلان ده مكان محمد هنيدي  
ولبس ده في ده واكتب كومت كده وانشر ويلا  
نضحك... غيبة! وما أـغـتـبـتـش الشخص دوت  
قدام واحد أـغـتـبـتـه قدام آلاف آلاف وكل دول  
اشتركوا أي حد رضي بذلك يعني اللي ما  
رضاش خلاص، أما من رضي بذلك وضحك  
وهيص وأنبسط فقد شارك في هذه الغيبة،  
دلوقتي الغيبة بقى اسمها شيك اسمها

"كوميكس" غيبة مجرد ما حظيتش شخص  
مجرد ما حظيت مضيع مجرد ما حظيت إن  
شالله وزيرة الصحة، وزير التعليم، حظيت...  
مفيش حاجة تبرر إن أنت تغتاب شخص طالما  
هو مسلم ولا يرضى بذلك، حظيت مغني،  
حظيت لعيب، حظيت مضيع، حظيت واحد  
بتكرهه، واحد بتحبه... طالما مسلم فهذه غيبة،  
صار الآن سهل جدا إن احنا نقع في الغيبة  
بالسخرية والاستهزاء، فضلا بقى سيبك من  
الكوميكس إن بعد كل حدث يحصل في البلد  
سواء ماتش كورة سواء مباراة سواء حاجة  
رياضية سواء حاجة سياسية سواء حاجة  
كوميديية لازم كل واحد فينا ينزل بحاجة تعليق  
ساخر كده علشان يركب الترند وعلشان يقول  
أنا موجود وعلشان يركب الترند وعلشان

الناس تضحك في الكومنتات عندي... غيبة،  
طالما ذكرت في تعليقك ذكرت شخص مسلم  
بما يكره فهي غيبة وكل ده هتسأل عنه يوم  
القيامة والله يوم القيامة هيكون يوم صعب  
{وَبَدَا لَهُمْ مِنَ اللَّهِ مَا لَمْ يَكُونُوا يَحْتَسِبُونَ \* وَبَدَا  
لَهُمْ سَيِّئَاتُ مَا كَسَبُوا وَحَاقَ بِهِمْ مَا كَانُوا بِهِ  
يَسْتَهْزِئُونَ} [الزمر: ٤٦، ٤٧] هتفاجئ  
ببوستات من عشر سنين، هتفاجئ بحجرات في  
التميم لاين بتاعك من ثلاثين أربعين سنة،  
هتفاجئ بكوميكسات مكنتش متخيل إن أنت  
هتسأل عليها في يوم من الأيام... غيبة.

من الكبائر التي يتساهل فيها الناس الكذب،  
والنبي \_عليه الصلاة والسلام\_ يقول: "كفى  
بالمرء كذبا أن يحدث بكل ما يسمع" ينبغي  
الحذر وأحنا على الميديا إن خبر نسمعه

ننشره وإن أي خبر يعدي علينا نشيره لابد أن تتأكد أن هذا الخبر صحيح وأنه يجوز نشره؛ لأن أحياناً كمان الخبر بيكون صحيح لكن نشره فيه ضرر فيه فساد ففي الحالة دي حتى لو صحيح لا يصح نشره؛ لكن خرينا في الخبر الغير مضمون اللي هو خبر كده طلع يلا كله انشر كله انشر ويكون مصدر الخبر نفسه عارف إن هو بيكذب واستعمل الناس في نشر هذه الكذبة فلا تعينه على ذلك فإن النبي \_ عليه الصلاة والسلام \_ رأى فيما رأى من مشاهد يوم القيامة رأى رجل جالس ووراءه رجل معه كلوب \_ كده زي المنجل \_ قال يضعه في وجهه ويشرشر وجهه إلى قفاه، فإذا انتهى من هذه الناحية شرشر الجانب الآخر إلى قفاه، فلما يخلص الجانب ده يكون الجانب ده التئم

فيشر شر هذا الجانب مرة ثانية، فسأل النبي  
\_عليه الصلاة والسلام\_ عن هذا الرجل قال:  
"والرجل يكذب الكذبة فتنتشر في الآفاق